

徐  
文  
長  
文  
集

徐文長文集卷之二十一

公安袁宏道中郎評點

門人章斐然華甫校訂

跋

文長短幅最濬逸才雋手滑有晉人風韻宋人理味

新建公少年書董子命題其後

重其人宜無所不重也。况書乎。重其書宜無所不重也。况早年力完之書乎。重其力完宜無所不重也。况

題乎。董君某得新建公早年書。願以題命我。

書石梁鴈宕圖後

台宕之間。自有知以來。便馳神於彼。苦不得往。得見於圖譜中。如說梅子一邊生津。一邊生渴。不如直啜一甌苦茗。乃始沁然。今日觀此卷畫圖。斧削刀裁。描青抹綠。幾若真物。比於往日圖譜。彷彿依稀者。大相懸絕。雖比苦茗。尚覺不同。亦似掬水到口。畧降心火。老夫看取世間遠近真假。有許多種別。不知他日支杖大小龍湫。更作何說。

書梅花道人墨竹譜

余觀梅花道人畫竹如羣鳳爲鶻所掠翎羽騰閃排  
袂變滅之詭雖鳳亦不得而知而評者或謂其屬意  
理也哉。

書畫後

仙人以道勝女婦以貌勝有人觀神仙於畫中則與  
一遇之及果遇之道未嘗不道也而人曰此非道也  
如昌黎之於其從子雖至親而猶不得相信觀女婦  
於畫中則與一遇之及果遇之貌未嘗貌也而人曰

此貌也。如登徒之於其妻，雖至陋而猶不以爲媼。是於道也抑何苛，而於貌也抑何恕耶？予偶觀此於某君館，令書故書之如此，爲昧者言耳。某君信道於早，而予讐貌於晚，不煩風與警，觀者當自得之。

書茆氏石刻

金華宋先生之重也，以道卒用於學士也，以文世珍其書。謂多由此，然即使不道不文，書亦自珍也。豐考功晚痺而跌，株連臂腕於書，不無少妨，而歸安茆君康伯購而簡刻之，乃並是兩公盛年五合時物，其寄

我以題雖非其人然殊快一飽語云匪耽逐曷鞞肉。  
送畫於寺書其左

右梵景乃塞僧所贈相傳爲李伯時筆細閱之信非  
伯時不能也題於上方者曰西河溥當亦非俗髡但  
不省爲何代人惜其手書亡矣代書者稍習文待詔  
體亦不俗今以歸華嚴寺清公之徒曰某供養之如  
蘇長公舍四板菩薩例噫亦都安哉

書蘇長公維摩贊墨蹟

予夙慕大蘇公書然閱覽止從金石本耳鮮得其蹟

馬子某博古而獲此予始幸一見之必欲定其真贋者則取公之贊維摩中語而答之曰若云此畫無實相毗耶城中亦非實

書米南宮墨蹟

閻南宮書多矣瀟散爽逸無過此帖辟之朔漠萬馬  
驊騮獨先

書子昂所寫道德經

世好趙書女取其媚也責以古服勁裝可乎善帝胄  
王孫裘馬輕纖足稱其人矣他書率然而道德經爲

尤媚。然可以爲稿澁頑麤。如世所稱枯柴蒸餅者之藥。

書夏珪山水卷

觀夏珪此畫。蒼潔曠迥。令人舍形而悅影。但兩接處。墨與景俱不交。必有遺矣。惜哉。雲護蛟龍。支股必間斷。亦在意會而已。

書李北海帖

李北海此帖。遇難布處。字字侵讓。互用位置之法。獨高於人。世謂集賢師之。亦得其皮耳。蓋詳於肉而畧



於骨辟如折枝海棠。不連鐵榦。添粧則可。生意却虧。  
書陳山人九臯氏三卉後

陶者間有變。則爲奇品。更欲效之。則盡薪竭鈞而不  
可復。予見山人卉多矣。曩在日遺予者。不下十數紙。  
皆不及此三品之佳。滃然而雲。瑩然而雨。泫泫然而  
露也。殆所謂陶之變耶。

書八淵明卷後

覽淵明貌。不能灼知其爲誰。然灼知其爲妙品也。往  
在京邸。見顧愷之粉本。曰斷琴者。殆類是。蓋晉時顧

陸輩筆精勻圓勁淨本古篆書家象形意其後爲張  
僧繇閻立本最後乃有吳道子李伯時卽稍變猶知  
宗之迨草書盛行乃始有寫意畫又一變也卷中貌  
凡八人而八猶一如取諸影僮僕策杖亦靡不歷歷  
可相印其不苟如此可以想見其人矣

書沈徵君周畫

世傳沈徵君畫多寫意而草草者倍佳如此卷者乃  
其一也然予少客吳中見其所爲淵明對客彈阮兩  
人軀高可二尺許數古本亂雲靄中其高再倍之作

細描秀潤絕類趙文敏杜懼男比又見姑蘇八景卷  
精緻入絲毫而人眇小止一豆惟工如此此草者之  
所以益妙也不然將善趨而不善走有是理乎。

書謝叟時臣淵明卷爲葛公旦

吳中畫多惜墨謝老用墨頗侈其鄉訝之觀場而矮  
者相附和十幾八九不知畫病不病不在墨重與輕  
在生動與不生動耳飛燕玉環纖穠縣絕使兩王易  
地絕不相入令妙於鑒者從旁睨之皆不妨於傾國  
古人論畫已如此矣矧畫乎謝老嘗至越最後至杭

遺子素可四五並爽甚一去而絕筆矣今復見此能無慨然

書朱太僕十七帖

予少時似聞學使者蕭公言元术括南中寶物裝數舟載以去卒沈於河而十七帖石數片在其中至是石起於濬河者卽此本也滿刺人能辨寶术虜耳舍馬上物宜無知而顧亦識此旣又不隨以往也此亦真神物矣哉然斯言也蕭亦得於傳聞未必然也予又見吳中晚刻別本引言謂勝此亦未必然也

又跋於後

昨過人家園樹中見珍花異果繡地叅天而野藤刺蔓交戛其間顧問主人曰何得濫放此輩主人曰然然去此亦不成園也予拙於書朱使君令予首尾是帖意或近是說耶

跋書卷尾

沈徵君啓南畫大約如伯陽初生便堪几杖是謂稚中藏老又如謝道媼雖是夫人却有林下風韻是謂秀中現雅而大蘇評靖節詩亦云由腴而造平淡辟

食石蜜。中邊皆甜。因知評別啓南如此則真。不如此則贗。而此卷者固已如此矣。誣以廣得乎。董文景老骨董也。高直收之。詎墮誤賞。

又

董文堯章一日持二卷命書其一。沈徵君畫其一。祝京兆希哲行書鉗其尾。以余試而視此書。稍謹。欽秦放不折校。余久乃得之。曰。凡物神者。則善變。此祝京兆變也。他人烏能辨。文弛其尾。坐客大笑。

大蘇所書金剛經石刻

論書者云多似其人蘇文忠人逸也而書則莊文忠  
書法顏至比杜少陵之詩昌黎之文吳道子之畫蓋  
顏之書卽莊亦未嘗不逸也金剛楞伽二經並達磨  
首舉以付學人者而文忠並兩書之金剛此帖是也  
楞伽以付金山參寥余過金山問文忠玉帶所傳鎮  
山門者亦爲頑僧質錢充口腹矣况經乎儻得如此  
帖摹勒傳人間亦幸也惜過時失問

讀餘生子傳

上虞葛子景文者一日方晏集息忽絕旣而忽生因

目其生爲餘也號餘生子自爲傳號餘生子傳子取而讀之曰異哉生之餘也天其獨厚於葛子乎楚之南有泰氏屯氏者均畜萬金一夕均燬於火幾乞矣幸而均取於火又均得其餘其一人善畜之以好施而崇福其一人不善畜之以忤時而賈禍則餘者不如無餘者之爲愈也曩吾見葛子於其寓有道人也其後絕而復甦也遂訪余於理視曩所見蓋益進於道矣其於其傳中已所云朝聞夕死蓋允蹈之者故其處也恒安其善用其餘生以崇福若所謂泰氏者



歟前年逆有陰變起而九自裁死與葛子同也幸而九不死生與葛子同也顧蹶蹶然置身於理是進道與葛子異也故其處也恒危其不善用其餘生以賈禍若所謂屯氏者歟一禍之一福之謂餘生獨厚於葛子可也然一進於道一不進於道謂餘生獨厚於葛子不可也

書馬君所藏王新建公墨蹟

古人論右軍以書掩其人新建先生乃不然以人掩其書今覩茲墨蹟非不翩翩然鳳翥而龍蟠也使其

人少亞於書則書且得矣而今重其人不翅於鑑其書僅得於銖書之遇不遇固如此哉然而猶得號於人曰此新建王先生書也亦幸矣馬君博古君子也哀先生之書如此其多將重先生之書耶抑重生之人耶

書吳子所藏畫

閱吳子所藏紅梅雙鵲畫當是倪元鎮筆而名姓印章則並王元章豈當時倪適王所戲成此而遂用其章耶近世有人傳虞世南草書大徑五六寸絕不

類世南其所書詩又是李白杜甫所作。去世南生時  
遠甚。而其印文十字。乃是華蓋殿大學士虞世南書。  
夫唐時何嘗有此殿名。又何嘗有此官。又印內文從  
來何嘗有結一書字者。並大可笑也。此蓋本朝夏閣  
老言書耳。夏老固亦號能書。然比於世南奚翅醜婦  
效西子顰。若元鎮之效元章。則南威偶效西子也。閱  
畫時適人以夏書來評。并記之。

書季子微所藏摹本蘭亭

非特字也。世間諸有爲事。凡臨摹直寄與耳鉢而較。

寸而合。豈真我面目哉。臨摹蘭亭本者多矣。然時時露已筆意者。始稱高手。予閱茲本。雖不能必知其爲何人。然窺其露已筆意。必高手也。優孟之似孫叔敖。豈併其鬚眉軀幹而似之耶。亦取諸其意氣而已矣。

書紅眼公傳

志有之。水柔人狎而玩之。火烈人望而畏之。稽諸吾鄉人。水蹈江涉濤。以求沒者。子於親往往有之。無待於丈夫而後能也。若所謂娥者。蓋屢著矣。至於耿鬱攸輕燎原。與祝融回祿爭雄捷。以破其圍而出其所。

名  
卷三  
一  
怙所灼者雖曰僅兩瞳子睚耳而癥痕烈然爲朱孔  
陽是以紅眼公名聞於世此與蹈水者奚可同日道  
哉紅眼之後世趙君煉者予家世親也爲予道其事  
因得柳君所爲傳觀之而敬書其後是日也予感忠  
孝節廉事而有醜於賊臣背子垢婦人也目光閃閃  
若曙星不啻晉人所云在牛背上者抑不知眼之紅  
於翁曩昔何如耶

書新建公二序手稿

曹操書余未及見而文公謂放之公書天風海濤乃

近元常元常魏人蓋操亦放之耶曩欽人持文公箋  
學庸稿本來相質特似今所見新建公送兩府官序  
稿大約俱草草而二大儒之爲儒則同故書法亦暗  
合耶兩序稿點竄不數字而世相傳溫公通鑑稿本  
多真書點竄亦僅僅兩公端慎殆亦暗合耶送劉府  
者自舉爵以後送費府者自橋踰以後大是警策而  
今全集中並逸知所逸者不少矣

跋司馬公草書

司馬伯通先生弘正間材傑也其草書倣聖母帖聖

母帖卽懷素上人書而聖母別是一家司馬書與張  
南安東海翁書皆宗聖母帖也聖母帖有蝸牛及老  
科斗脚肥者及縫衣匠剪子者皆是法未可以微疵  
而短其醇伯通仕業亦豪俊其詩多清豁罷官書門  
榜云獨呼明月常倍醉不負青天早放閒人至今誦  
之

趙文敏墨蹟洛神賦

古人論真行與篆隸辨圓方者微有不同真行始於  
動中以靜終以媚媚者蓋鋒稍溢出其名曰姿態鋒

太藏則媚隱太正則媚藏而不悅故大蘇寬之以側  
筆取研之說趙文敏師李北海淨均也媚則趙勝李  
動則李勝趙夫子建見甄氏而深悅之媚勝也後人  
未見甄氏讀子建賦無不深悅之者嗟之媚亦勝也

書草玄堂稿後

始女子之來嫁於壻家也朱之粉之倩之顰之步不  
敢越裾語不敢見齒不如是則以爲非女子之態也  
迨數十年長子孫而近嫗姥於是黜朱粉罷倩顰橫  
齒之所加莫非問耕織於奴婢橫口之所語莫非呼



雞豕於園槽甚至齧齒而笑蓬首而搔蓋回視向之所謂態者真赧然以爲粧綴取憐矯真飾僞之物而娣奴者猶望其宛宛嚶嚶也不亦可嘆也哉渭之學爲詩也矜於昔而頽且放於今也頗有類於是其爲娣奴哂也多矣今校酈君之詩而恍然契肅然歛容焉蓋真得先我而老之娣奴矣

徐文長文集卷之二十二

公安袁宏道中郎評點

門人章斐然華甫校訂

贊

諸贊趣味依稀處直逼長公

觀音大士贊

一觀音法而有二評法華他機楞嚴自行溫陵孤山  
又備兩經真者有兩畫者亦然一似道子一似龍孫  
台兩爲一妙哉俞了之管

白描觀音大士贊

大士觀音道以耳入卅二其相化門非一而此貌師  
繪不着色似吳道子取石以勒

題大士圖

今亭婆子萬蓮葉  
觀音處偏其上

萬里波濤琉璃拍天蝦鬚魚鬣鯉尾蜃涎靡不照澈  
如鏡照鈿儼此大士筏彼海蓮一塵不動而百魅伏  
跼問何以故曰吾不用何以而亦莫知其然

提魚觀音圖贊

潑刺潑刺婀娜婀娜金剛法華一棍打破瞞得馬郎

瞞不得我

折蘆達磨贊

片蘆長江。隻鞋葱領。弄此伎倆。作傀儡影。我諦思之。  
必傳者訛。麻姑被晒。擲米成砂。

伏虎畫贊

我觀伏虎。曲蟠以枕。諸繪耽視。茲獨以寢。秘威如待。  
不覺愈猛。裴旻遇之。應手弓落。李廣夜行。蓋冰以却。  
書瀘水羅漢畫贊

諸江河水。若彼微蟲。爲有性命。爲無性命。爲俱有性。

命爲俱無性命。若俱有者，蟲旣應生水，何獨受烹煎？  
燒煮諸苦毒楚，若俱無者，水旣應烹，亦應煮蟲。云何  
濾蟲煮水，作是分別？若謂蟲則含靈，水無知覺，諦觀  
二物蟲體泳游，水含流性得躍爲蟲，付流卽水覺與  
不覺有何差別？辟如有人發心愛惜象馬牛羊，不忍  
宰殺，而於鱗魚蝦蚌妄加解剝，或亦於諸蝦魚鱗蚌  
心生愛惜。於彼草木，斬刈無遺。彼諸有物大小動植  
體則不同，所含生性等無有二。云何殺彼舍此起分  
別心？濾蟲煮水亦復如是。弟子迷惑不能通曉，是義

惟大羅漢正坐諦觀作何解說宜豁迷悶弟子徐深  
合掌禮拜而作是語

蓮葉大士贊

謂船是紙梢公是鐵梢公尚然況大菩薩

東方朔竊桃圖贊

竊攘匪污詣射相角無所不可道在戲謔

純陽子圖贊

并序

世所傳純陽翁象皆本其傳中所載記者人  
望而識之也是圖與世所傳者特異相沿謂

翁於近世示現人間其狀貌若此故人得按而圖之說紛紛不一中軍陳侯雅尚道術既喜得斯圖於其友人遂令予贊之

昔圖若彼今圖若此昔耶今耶一純陽子凡涉有形如露泡電以顏色求終不可見知彼亦凡即知我仙勿謂學人此語墮禪

梓潼像贊

伏淮帝君三十餘化生民之初一十七世爲士大夫當帝爲星神在翼張棲帝於蜀神在岷江寫帝於錄

神在丹青遍諸沙界無非帝所志孝文武靡禱不許  
矧茲桂錄如海一粟豈舍此雋異而以與執

又

帝君生當周之紀身士大夫十七世自茲以往生知  
幾人間萬事靡不理柄司文章其一耳我昔聞之古  
所謂文非筆墨子經史懷柔萬民德遐邇帝君作吏  
文德丕翮然騎龍馭箕尾人傳文章帝君事辟如大  
海一滴水爲龍爲神宵夢裡素靈御攬暗孽子如此  
之云俱幻詭馬君供帝姚子繪圖也作贊幾於戲帝



卷之三  
君之事亦眇昧陰陽兩言是真諦

### 三教圖贊

三公伊何宜尼。聃墨謂其旨極。轅北舟南。以予觀之。如首脊尾。應時設教。圓通不泥。誰爲繪此。三公一堂。大海成冰。一滴四方。

### 四老圖贊

乘者鹿羊牛也。而非車馬。蒼頭奔奔然者。有昂然之氣也。而不稱平野。四老者。之偉而聳也。或以爲商顏。米芝之輩。鴻飛冥冥矣。而胡爲乎淺水。平山將舍郊。

而入郭等少年之游冶。抑以爲應孝惠之招矣而未  
見馳漢廷之使者。安得起留侯於九原而辨其玉之  
與瓦。

### 四仙圖贊

色身不全。謂非法器。此虛言耳。神光斷臂。鐵拐

又

是宜土昇。爲神仙祖。無望礙心。是活子午。鍾離權

又

遍遊人間。翁嘗見八人。不見翁。索翁以形。呂岩

又

當其騎驢不免尋覓今其下驢欲覓何物張昞

高皇帝像贊

上之巖也天高以覆耶下之豐也地載以厚耶掃孽  
胡而握漢統維斯之與味耶眉采耶目河耶唐虞  
之後耶氏以朱耶金天氏之胄耶是爲我 聖祖高  
皇帝之面耶部耶

一品三公圖贊

漢官搏執取金吾鳥示法戒遲師授以棗古人托喻

似拙而巧。誰爲繪此一品三公。揆厥所喻。意與古同。君子得之。尤爲吉徵。

鳴教出所藏郭畫一叟持玄物。類石方長數寸。開口語又所携竹筐中。植一小檠置道旁。一叟聽其語。執冊肘若却避。然令贊之。

初觀三叟爲默。爲語似有所授。及諦觀之。默然以墮。有物在手。體玄守黑。曰此真詮。爲天地母。是宜聽者。委其陳。編驚却其肘。樹表於筐。如賈用售。則不可究。自書小像贊。

吾生而肥弱冠而羸不勝衣既立而復漸以肥乃至  
於若斯圖之痴痴也蓋年以歷於知非然則今日之  
癡癡安知其不復羸羸以庶幾於山澤之癯耶而人  
又安得執斯圖以刻舟而守株噫龍耶豬耶鶴耶鳬  
耶蝶栩栩耶周遶遶耶時知其初耶

又

以千工手鑄一佛貌泥範出冶競誇已肖付萬目觀  
目有殊照評亦隨之與工同調貌于多矣歷知非年  
工者目者評者如前偶兒在側令師貌之貌兒頗肖

父肖可知今肥昔癯人謂癯勝冶氏增銅器敢不聽

商大公子贊

公子爲誰特專龍經雅志林壑築室土城授鄙以記  
刻之貞珉當始弱冠面白鬢青久矣未面瞻圖之形  
頰須竹朗頰姿玉晶觀其所養占其所成

余東白贊

古濠劉公來牧我邑授簡試子子年十一試子何所  
余翁之宅公侯大吏借館於子子訟亡奴執狀以須  
當斯之時東白未生計東白世乃翁之孫翁旣徂矣

公亦仆矣大馬踰耄倏且枯矣東白都矣今舉數矣  
自越而西聞東吳矣植桐與焦隨寓居矣此君一日  
何可無矣懿哉東白寧非夫矣言念劉公館公閭矣  
屈指其歲六十餘矣贊圖而起擲筆嗟矣

宗侄像贊

色如芙蓉兼兼頰頰入市而歸投果滿車四十如此  
三十當何如

又

北窗五十須不可數歸鴈夕霞芙蓉秋浦

又

六十之年去五十近相睽幾何至不可認矧再十齡  
胡驀逢而不誰何以問

婁叟像贊

數年之前令我書貌頃復令書覺微倍老書儻再三  
老應更倍願叟百年屢書屢繪

吳君像贊

雙輔承顧有物朗匝笑語之間林竹振頰圖且改觀  
况覩其真未見有此美髭矣而不樹勳名



郁君小像贊 面天鰲者

瓜。匏。白。肥。但。可。淹。沮。松。柏。多。鱗。乃。中。梁。柱。相。君。之。貌。  
安。得。不。去。彼。而。取。此。

書馬策之像贊

清。嘯。玄。談。惟。顙。是。助。辟。彼。林。竹。風。生。而。發。怒。風。歇。竹。  
凝。脩。然。其。止。肅。然。其。理。良。亦。有。斐。然。則。靜。且。默。也。未。  
嘗。不。宜。於。顙。也。

范子小像贊

范。家。駒。日。千。里。卜。新。居。近。其。止。贈。我。雙。魚。尺。牘。知。

王子小像贊

相君之肥飽德於中所以不願人之膏粱古人有言  
有後於魯不果徵乎穀也豐下

傅子像贊

傅能書梅復善琴

梅花一物也而君枝兩精之一出於毫一出於絲人  
貌君儀宜其爲滿然之多子遠而望之梅爲君也蒼  
然若櫟栢拘

柳生小像贊

都昌五子肖厥考元穀軀幹特短小軀則短小文甚

藻辟如馬氏有白眉白眉用以別五常短小亦用別  
弟兄

許伯熙像贊

古人力道戰勝而肥亦曰壯夫其鬚如戟彼貌像者  
爲誰兼而有之可以知其中之所得迫而視之吾所  
與士之林文中虎其貌古其姓許

草誦

井序

王懋新自刻携小草八九葉懸於空中凡五  
年不甚叢生而亦不死暴烈日中愈青暢相

沿名仙草予攘而得之戲爲之謔時酒酣  
蕭女臣作挽詩故末句云

青青之草麗而匪麗將歸五霜彼知其幾遇風而化  
得羽之氣豈河上丈人之神爲造物者蟲臂鼠肝之  
也而零星於是帶乎上不在天下不在地中不在人  
是其夙世之能心而今輪迴漂轉適墮其習緣也猶  
超然於空際乎噫人皆知不死者之爲不死矣孰知  
死者之爲不死而盡問之於吾友之蕭季乎

題鳩

爾性何拙何不能綱紀而何爲好奪山有喬木木有  
垂蘿爾不能取其皮而爲其窩豈無陰雨時取彼斧  
柯而啄之嘴咀而瓜之爬羅上棟下宇前堂後楹維  
鵲爲之爾享其成徒珍其頸徒班其翎豈不能潤屋  
而能潤身

徐文長文集卷之二十三

公安袁宏道中郎評點

錢塘許爾京士魏校訂

銘

諸銘文自情生豈曰法古然却居然大雅

歙石硯銘

并序

出歙西門步長橋望黃山羣峰插天如劒戟  
入門就小肆用錢二百五十貨得此石雲紋  
而寶沙照日中瑟瑟若東夷所鑿屏扇然以

墨易膠稍乾爲磁吸鐵龍尾之佳者也時王仲房賞之曰轉博可得錢千五百久之歛客從獄中持歸爲余斲兩碁而復璞以來余將寄斲於吳而先銘之如左

市於歛歸於越復返於歛終來歸於越石耶能忘情耶銘於若盧斲於吳安保其終於吾人耶能有情耶

歛石硯銘

俱金星玄色

不食肉色故墨君子效之絕葷以養德不聚金布則星君子效之散財以養身

又

長弘血老千年。黜女媧。割取三垣宿鉅。橋撒粟一掬。  
朽亭長左股。畫不守雲興水泳。龍夜吼。

端石銘

端石之嘉。屢墨有聲如蠅。跋沙斯乃然耶。翩翩公子。  
夢筆生花。

又

鸚鵡之眸。有無不足求人。且病眸爲石之流。

端石螭硯銘



領則燕而虎爲頭。睚則螭而鸛鶴爲之眸。彼飛而食肉。此飛而飲於流墨。卿耳何足以侯。

無眼端石銘

鸛鶴之日偶端石。或取以驗真。或指以爲疾。我則不然。問果落墨不落墨。

馬策之端研銘

端紫鸛鶴睛。此俗見孰不能。此端紫之鸛鶴以麋。

喻麋嶷刀削玉

又

小端稠墨捷。翡翠之削金。毫屢閣而不染。赧難爲乎。  
苦吟。

鼉磯研銘

稠喻麋。一何捷。敗頽兕。猛於獵馬。善走必蹄。齒才難  
哉。

又

拔中山。吾女訝。猶勝彼。攻卽墨者。終歲而不能下。

鼎研銘

硯面圓徑尺。沿寸亦圓。  
而橫墜井之足極短。

背之日。鼎其腹。烏三足。雖蹲以馳。迅義殺而之。月吐。

蟆啄沼勺水。鬼微復寸冰。雹兮宛如臍面之雲。陰廉  
與寸膚用以雨蒼生。

破膽磬銘

并序

家藏古白磁膽瓶。嘗採梅枝浸之。歷春夏花  
而實後破於冰。考其聲類。洎濱嘉石取其半。  
縣齋中銘曰破膽磬。

膽之成。水入空出。以養其莖。目觀其色之紫。膽之冰。  
水出空。人以縣其傾耳。聞其聲之鏗。一山一入。爲聲。  
爲色。見聞別。美妙性不忒。

刺匣銘

如鬼如帝。一物今達爾司。其滕操而不發。外貌則淺。實折其裏。古有藏名。其殆謂子。

篆積銘

嘻。吾何嘗不吏於茲世哉。塵以外吾悉得。而主之故。謂符無拘。陟黜也不時。故目亦不一。其除其所奏。記者。始初之堂。闢白者。裴筮之鄉。而一爲檄召。則維猿鶴之章。苟一用於塵內。朱數日而不揚。敢告爾積庶。謹其藏。

竹秘閣銘

大書縣臂，小則不能臂，濡於墨而漬於紙，何以異於  
夏月之蠅，不縣而縣，惟女勅。

又

中書大書，用肘與腕，蠅頭蚊脚，握中其管，閣以擎之，  
墨不流肘，刻竹爲閣，創驚妙手，妙手爲誰，應堯張奧，  
書積銘

噫，此古之所謂博學君子者與？歛而閉之，惟木扣而  
取之，惟欲入耳出口，小人之腹。

又

古人已死君何讀弗得其精兮何異爾積。

徐文長文集卷之二十三

終

徐文長文集卷之二十四

公安袁宏道中郎評點

錢塘許爾京士魏校訂

記

蜀漢關侯祠記

文色蒼然

馬水口爲備胡要地。舊以其任付守備。比始用廷議。設叅將一領。卒三千人以鎮之。謂遼東李君某爲今寧遠伯冢嗣。世稱名將家子。往鎮莫宜。詔曰。可。君至。則一省關樞。令貨趨集。便卒需卒死。無以葬。則

出已鏹爲死者棺殮飯祝異時卒馬死王將得自補馬操其羸直公悉不然勞逸苦甘與卒共有旣又節縮已奉度可搆塗乃顧視北門從萬山中得靈秀所作廈一區爲殿者二爲門者一竝足三楹兩廡翼之甃蓋材工靡不緻好燭卜時日奉蜀漢前將軍關侯象以居之歲時伏臘刲羊豕吹簫歌樂用以侑神已乃促騎抵燕迓予以來而以記屬予過君請曰何居君曰其不敏生而慕忠孝節義人而蜀侯爲最著歿而爲神又惟侯爲最靈曩在遼從大人逐胡夢寐見



之若有所感、今茲門以北數程、胡落也、于世受國  
恩、爲國備亭障、正如孝子之奉慈親、卽有痾癢、宜無  
所不至、豈憑恃剗療、遂廢禱于神、祇予應之曰、郅都  
在漢、匈奴憚之、迨其歿也、爲偶以射、竟莫能中、侯勇  
義朗映、華夷所嚴、非郅都比、矧生者有公輩在、胡如  
有知、寧敢望馬水發一矢耶、至於史所稱侯愛惜士  
卒、獨悔嬖士大夫、愚以爲卽使有之、特加於請昏之  
狡吳芳、與士仁等之携貳、而不知彼三人者、皆漢賊  
非可與語於士大夫、君旣惜士卒、至賓客賢豪、靡不

倒屣虛左是與善學侯者君之祠侯宜莫宜於此矣  
某謹爲書曰祠始於某年月日越若干日而成費金  
若干輩役者爲某官某

坐臥房記 簡致

凡人居一室之中晝則坐夜則臥坐則箕焉弓焉臥  
則蛇焉龍焉此夢覺之常耳人孰不然而青野子顧  
作室而房之而名之而使予記之何居莊周有言夔  
轔虺虺轔蛇蛇轔風風轔目目轔心謂行者不如無  
行者之妙也行者動以形也無行者動以神也無形

之動是之謂至動然則不必不行也不必行也而一室之中可以照天下觀萬有通晝夜一夢覺而無不知不然其坐也箕焉弓焉而已矣其臥也蛇焉龍焉而已矣人皆能之而青野子何以之而名房哉

西施山書舍記

與長公凌虛臺記差近

西施山在縣東可五里越絕若吳越春秋並稱土城後人始易以今名然亦曰土城山蓋句踐作宮其間以教西施鄭旦而用以獻吳又曰恐女樸鄙故令近大道則當其時此地固鉅麗要津耶更數千年王者

不可問矣。商伯子用值若干而有之。山高不過數仞，而叢灌疎篁，亦鮮澄可悅。上有臺，臺東有亭，西有書舍數礎。舍後有池，以荷。東外折斷水以菱，而亭之前則仍其舊曰脂粉塘。無所改出。東南西而山者聳秀，不可悉悉。名山也。遠其舍而畝者水者，不可以目盡。以田以漁以桑者，盡畝與水無不然。余少時嘗觴於此而樂之。茲伯子使余記，余雖以病阻，其鴈然尚能憶之也。率如此。嗟夫！土城一山耳，始以粉黛歌舞之，宮當鉅麗，傾都之孔道。而今變而且遷之一旦，寥寥

然爲墟落田夫野老耕釣徘徊於其間或拾其墮釵於鋤掘迨於陰晦又往往詫野火轉燐於夜歸牧唱之兒童宜無不感而嗟資野人之聚而談者矣至其易治以樸易優伎以農桑本業專而譎俗厚則有識者又未嘗不忘其悲而爲之一笑也伯子聰敏擅文譽達事變試從讀書暇一登茲山而望之或觸於景而有如吾前所言者姑取而咀之儻亦一解願耶伯子名濬字景哲

函三館記

辭達而爽

吾儒曰三才老曰三生萬物而冠之曰一生三乃釋也則不立言矣卽一字且掃抹之矣而况於三乎乃其舉世界之中之外之諸有至於竭恒沙之數而不可殫卽隸首復與弧矢勾股操其法日百億聚其徒用其百億徒之指以礫碌奇偶而乘除之亦日且不給矣又何貴於萬與生萬者之三與生三者之一哉然則爲儒者將何居曰一非自能一也從無而有一也三非自能三也從無而有三也萬非自能萬也從無而有萬也辟之生人然一者始生祖也三者父也

萬者子與孫也。孫孫子子相爲無窮也。則上古未生  
人之前祖從何而生哉。知此則爲儒者知所以居矣。  
陳子起侯名汝元。別號太一。以小戴禮舉明經。今爲  
文學於郡者。抱美質外醇而中茂。志淵以勤。意不欲  
沾沾稅駕於小儒。乃作館藏書動以博文。靜以觀妙。  
晝夜孜孜。若有端倪。命館曰函三。記則屬余。余憶兩  
三之說。雖出於小戴。註家乃昉於弄丸公之皇極經  
世而弄丸公之於此也。余莫得而闢其門。又頗憶河  
南青田及考亭五先生闢其門矣。至其自檢亦各謂

未得入其奧。然而後之秉道權者。往往以孔門正派。印五先生也。而以數爲支流也。則似稍稍微詆弄九公也。則數之與道。果孰爲左。而孰爲右。非闔其門而。未得。若區區者。所可幾也。乃文學則必籌之熟矣。抑余右所云無也者。祖者。非敢以虛無之無。溷文學。乃謂萬有本於無。欲文學。謹未發之中。之謂也。夫儒參三才者也。一中立而天地位。萬物育。故子雲以爲非此。則止於伎。雖然。寧有通天通地矣。顧不能通人耶。子雲亦謬儒矣。周王季三氏大君子。無所同也。用所



不同也。將各各普於世者同也。而一爲經一爲出者不同也。

游五泄記 古峭

萬曆二年十一月廿有二日。偕王圖吳系馬策往五泄。初宿謝家橋。明日雨山行。驢不可負。莫至楓橋。駱君意舍止焉。明日其兄懷遠公驗來。又明日飲懷遠罷。入化城寺。又明日陳君心學來。又明日飲於陳君止焉。又明日午始霽。遂行兩宿而至五泄寺。是爲至日。遂登已而大霧。窮宇內不見寸形。渾若未開。忽復

霽遂窮五泄下題名鐫寺之石鼓是夕雪明日午復  
霽往觀七十二峰攀捫裸厲陟自西潭以漲甚返又  
明日陟四泄之對岫觀四泄下飯於寺遂褰以歸踰  
響鑊紫閭長青三嶺日仄至洞巖寺飯罷已燈僧祖  
福縛炬請觀洞巖入至第三洞之鯨口洞故有外屏  
近爲占洞者所壞泥入壅鯨口返又明日黎飯復行  
入湖船一夕而至金家嶼甫明踰兩小嶺午泛離渚  
日仄抵家是觀也洞巖奇於陰五泄奇於陽而七十  
二峰兩壁夾一壑時明時幽時曠時通奇於陰陽之

間以余評之殆莫勝於五泄借物以形容之終不足  
蘇長公游白水佛跡山云山上瀑布三十仞雷輶電  
散未易名狀大略似項羽破章邯時庶幾近之矣是  
行也去來凡十有三日陸行三百里水行百三十里  
宿於駱四夕於途如之於陳一夕於寺再宿於陳余  
墮驢者二越溪而溺者一濡者四五驢蹶於巔者三  
諸子淖而跌者弗論也得詩二十首每作諸子必和  
之

閩記

代

周匝通顯

前知府富順湯公紹恩之聞三江也事具陶莊敏記  
中至於今五十年無以潦告者膠石以灰秣久而緇  
石因之亦少泐水日夜走罅中顧有以旱告者矣萬  
曆癸未宣城蕭君某以戶部郎中來知紹問俗所苦  
知而往視之得所以白其事於省諸大吏許之協其  
議於僚二三君令判府楊公某專其治而屬工於縣  
丞某出庫羨銀若干兩役夫若干人用冶錫室所泐  
竝發巨石凹凸其兩顛而規之凸以枕上流凹以銜  
舊甃匱包之令水不得越新包齒舊甃銜之際冶鐵

爲小腰以錮之其於舊蹇如車有輔如齒有唇倍壯  
且久君雨雪躬往幾月而成成以予同年也謬以記  
告曰無他以屬後也予嘗聞父老言始湯侯時以民  
苦潦其故役三江及役而民又爭以病告此猶可委  
曰初不知利如此也而今則知之矣最可委又不過  
曰湯費則課畝役則槩發丁也而今蕭侯費則庫羨  
役則民日予銀三分役兵兵嘗有顧則予二不課畝  
槩發丁矣而尚有以不便歸蕭侯若曩昔湯侯者則  
後之便蕭侯者安知不如今之便湯侯者耶始虜裘

繼衮衣始病褚五繼美誨殖下之難調蓋自古而已  
然矣。閘濬而啓不時則海畝者竊決塘竊則罪故海  
民謗閘無閘則海魚入潮河魚出汝閘則否故內外  
漁通閘者謗閘他則宅是者謂閘阻潮汐吐吞改水  
順逆關廢典故宅是者亦謗閘。夫謗烏足信也。而或  
者謂閘啓閉故有準乃萬不可爽爽有微甚則畝害  
亦視之。此其敝在掌費者靳與私則然。其涸也則外  
漁賂以滯閉者則然。斯二者誠有之。非謗之類矣。噫  
此其責亦可謂下之難調耶。夫造物之生人也勞矣。

生而病則資醫。無醫猶無生也。故醫之勞與造者等。今開造者誰。湯侯也。醫者誰。蕭侯也。繼蕭侯而醫者。知爲誰。勞則等也。醫之劑。凡幾。窒泄於斃一也。斲而滯。啓賂而滯。閉者痛。砭針之二也。

西溪湖記 纖悉

虞之爲縣。壤高河水東下。舊有湖曰西溪者。當縣西南。主蓄水以備旱。三鄉負郭之畝。恒賴焉。宋末李顯忠旣請其高者以牧福邸。仍之遂盡。田以庄湖始廢。早輒不登。元尹林希元欲復之。不果入。明田旣稅。

則湖益不可復矣萬曆癸未夏旱知是邑者爲朱侯  
既合衆以禱乃更求長策得湖以請於府某公某若  
省及分省諸公並得可遂復湖湖東起湖山麓北抵  
鄭家堡迤北以西至龍舌嘴前村之高阜南盡長港  
埽從而長得弓可九百二十七畝而廣損從者三之  
一周而度之爲丈者千七百五十二當湖爲田時計  
其畝可千六百二十六茲復田以湖宜仍抵湖以田  
也而夏蓋白馬三湖適得新括浮畝可五百有奇第  
都之區曰十二者括地復得隱畝九百餘一百直買



之以抵田而稅有隱羨於其所者若干括得之適相  
當復用以抵稅蓋二抵具而潮告復始果他若水道  
宜塞者塞之凡七所宜引以佐潮者引之凡三十有  
六所開之以瀦以泄坊一以表築室一以省責其成  
於里之正長畚鍤所及計高廣近遠而課之竝有差  
費取倉粟庸取募丁閱幾月而迄事是役也不勞民  
不耗公取浮修墜下相地紀上佐天時而中免夏畦  
之桔槔使吾虞千百年之久魃雖苛不能必饑與殍  
於吾民也是孰使之然哉衆謀記於予予謹記曰侯

名某字某某地人以某支干進士來知虞治廉平而  
興學獎士尤諄諄云

義塚記

代

言法而正

古者井田以養民亦鑿井以共飲而死徙無出鄉四  
井爲邑間有徙者徙是邑而已故易之井曰改邑不  
改井往來井井曰改曰往來者徙也曰井井者言徙  
而相恤彼井猶此井也易舉飲之井固卽耕之井矣  
夫有田以養何煩於客徙而不出邑又安有客而死  
者後世井廢而養窮則不得不取養於客客而不能

歸則不得不鬼於他方而燕爲多多矣而欲逐以營之如范式李勉其人則燕又爲少會稽白子受采義人也求鄉之老而賢者十人與飲誓醕而興曰殤劇矣盍塚諸然塚必自吾鄉與山陰始十老曰諾告而從者三百人得銀之兩千一百四十有奇買地逮宇齊化門之外六里曰崇南坊飭而塚焉其大可容其規可以久事旣迄白子以予嘗與聞也遂以記謁予蓋嘗讀周禮塚人而疑塚人之設若曰官出地以族墓國民有墓大夫以掌之則民宜無不墓者矣而禮

記月令乃復有孟春塋斂之政西伯之仁其使民送死常必無憾而岐周之野又間值遺枯而僅幸以掩夫若此者豈古者墓大夫之葬特專爲不遠徙之農民而職業所拘有行貨行役於他方者猶不免於溝壑乃若西伯之掩而曰枯此則亶父尚未遷岐時之鬼耶夫王政亦何常要在隨時而補之以義墓大夫不足故補以埋斂岐之枯失於先故補以追掩國家所在有公塚以澤諸殤塚亦曰義初不虞客鬼之多如此也公塚而鞠故補以私徙則出鄉矣而死猶

似不出其鄉之井也予感且嘉焉故記成而置碑仍  
其名曰義塚他若塚多羨地與舍酌所息以需事特  
詳而尤善者隔女塚以別嫌籍地舍若工始末時若  
課工若諸創者助者貲者名氏若貲之等悉碑北

石頂浮圖記

代

詞思饒畫

始予之治新河也本以利農士相顧指形勝曰是且  
利我乃遂以新河口可浮圖請予復爲作浮圖於河  
口小市石頂梯者九觚而面者八高以尺計可二百  
所糜銀以兩計凡三千有奇率倚募不出帑一錢總

而董之者爲某官某分而理之者爲某色人某出納  
而監之者爲生某始壬午九月迄乙酉四月而浮圖  
成子嘗謂人處天地間而氣與之通氣有溫涼寒暑  
濁清忻慘和沴凡此諸祥與諸不祥竝從人口鼻膚  
孔榮於藏府乃始澆漱志慮儲於心胃而發揮於事  
業與飲食衣服功用大相等蓋一吞吐服習間而靈  
蠢係之故昔之人視山川城郭間氣有欲去而不留  
者必假物以留之若投轄於井牽挽酒賓使復宴笑  
一堂不遂落莫蓋自樓觀亭臺以至改一檐蔭一樹

而浮圖則其最大者舉無非留之之具也氣留則爲諸祥氣不留則爲諸不祥故有疆域壞聯也而郡邑郊墟相去僅炊煙而風物人才不啻胡越者則所云吐吞者有以異之也留屬具使具而苟焉則猶無留舟之得水與其風也必帆而後駛帆大小同苟完缺異而駛亦因之矣浮圖從大江高石頂拔起二百尺觚八面而九梯之其爲帆之大且完也不已多乎今夫爲子弟者以疾告其父兄必先以療不已而至於請召史巫爲厭勝必且聽之不如是則猶爲有遺力

使堪輿氏舍其繆迂用此道以治山川城郭誰得而  
舍諸雖然此在父兄言則可也萬曆某年月日浙山  
陰某記

修郡衢記 簡折

紹爲府領縣者八東南西三道綰錯而道於他府號  
最衝凡縣若他府有事於紹之府者輿馬與人蹄踵  
如織雷轢而杵鳴介然惟一衢乘之而際府治者爲  
甚故其圯也亦易於他衢圯而霖則沃不霖則傾不  
特病於履於觀亦陋今庚午或有新之之請當其時



知府事者爲某判爲某推爲某成以爲此歲方饑卽  
衢矣必且勞民與其勞民寧陋觀而病履也而民之  
輩某某者相與謀曰三公明府以勞民而罷衢卽以  
毋庸於勞民而新衢者請可得也於是某等以其辭  
請諸公可之遂衢衢成計府以南止橋以東止閘之  
東踰若干步爲丈縱者若干橫者若干計石若干役  
工凡若干銀爲兩者若干銀所自出上自閘之大老  
若卿大夫士下至庶人凡若干出銀之等多至若干  
少亦不下若干蓋所謂毋庸於勞民而便厥履新厥

觀者也邑人某記

長春祠記

踟躕掩映大有風容

歛之何君曰洪者其父翁諱某當嘉靖某年間賈於杭得君最晚其後翁漸老君曰賈不可已而養又不  
可違於是始買廬以迎翁遂世爲杭人旣歿塋湖南  
之麓刻木爲祠甲子間君之仲子良有疾大困禱醫  
勿驗會人曰餘姚有徐叟永者能致神迎之永所致  
者神附筆以書自云純陽子輒賦詩詩曰三春柳外  
鶯聲好啼落殘紅半樹花分付杜鵑休叫月一窓香

雨濕春沙書已君誦詩知是  
不可救已然時正冬而  
此云三春卽不救宜尚緩後六日  
是死君懼復令永  
致純陽子問所以純陽子曰昨云三春三春者謂是  
六日人也示矣主人不之省耳君大愕且痛哀其子  
純陽子因謂君曰死者不可救矣生福不可修耶吾  
爲爾號福修子且曰吾輩近亦厭壺嶠而欲少憩人  
間西湖之南有山曰長春君家墳墓在焉其爲吾卜  
築於此爾兩世祖皆吾仙籍中人故來以此相屬吾  
屬不可妄得也君稽首聽命於墓之麓卜日命工面

江翼山中莫一閣左右夾之上構一亭飛梁壘石下復以室用備時享甃池澄深欄楯聯校維樹鮮花奇禽響答儼然紫都始青之鄉凡所規摹悉出神意扁聯之畫亦並神書多至數百餘字悉皆瑰逸迥無埃塵始某年月日既成肖像以升凡列仙籍者自某位至某位十有幾人而君之祖某公若女祖仙姑與焉四時之祭品數有等直計工財糜金若干餘兩予始聞謂神仙方厭世而復索居於人初不甚信及是會何君於逆旅君飲我以酒道其事甚詳予觀何君信

人也。予雖不信茲事，豈宜疑何君哉？予嘗覽純陽子傳，純陽子與人間來往事至多，不足甚怪。至王方平欲會麻姑，豈無其所？乃至飲食於蔡經家，此猶曰暫耳。若梓童真人，令荀洙父子爲其作殿，自扁曰霄霞，目爲之記，而復自書之，其畫與文悉晉人名家筆也。是孰能僞之哉？今而後乃知世有忠信不琢之士，如何？君者雖神仙亦不得而遠之也。如此，然則今之記君，宜請純陽子自爲之，如洙父子然，要當不下梓童真人而顧使予凡近者爲之，又何也。

半禪庵記

此等叅微真與長公頡頏

人身具諸佛性。辟如海水。結諸業習。辟如海冰。當其  
水時。一水而已。安得有冰。及其冰時。雖則成冰。水性  
不滅。又如煉汞求朱。矯白爲赤。齊鉛作粉。熨白爲玄。  
變染而成。各有界畔。如山吳達越。必經錢塘。江心之  
際。吳越分矣。然東則投吳。還西則越。分無定形。際難  
剖趾。由斯以宣。半義舉矣。徽之休寧居士程希正甫  
家黃石潭上。大谷中。萬松最深處。垣園百畝。名松逸  
園。栽勝構建。旣成。八區景聚。心娛莫不畢備。乃就半

山束茅以庵用旃檀肖大士及諸菩薩栖其中而題  
曰半禪書其鄉王山入仲房園記以來而摘庵記於  
予予惟正甫爲人風雅勻停根塵融會所云半禪將  
謂居士未離家緣是則半俗稍脫塵網是則半禪斯  
義諒爾辟如塑像工人以一石香肩和一石土沙而  
爲一佛香穢雜處終不成半又如鶩鷄鱉生一頭東  
行一頭西赴不着一邊大修之人不若頓超諸緣盡  
澄性海則茲半俗莫非半禪舉茲將化未化之冰悉  
還一水無禪可半何況半俗鉛白汞赤越東吳西義

復如是天池居士方墮無限俗中有全禪契真諦不  
妄爲作是記儻書入石記持向仲房古矜二長者參  
之。

呂氏始祖祠記

餘姚之有諸李其一爲呂也而呂之遷餘姚者則自  
新昌始蓋在趙宋有呂億者仕某宗朝爲大理評事  
扈蹕而南遂家新昌七傳而至鍊鍊父某尚宋福邸  
官郡馬當其時虜逼宋且及咸甌鍊始圖遷避之不  
果傳珙珙傳貴義虜果及而始遷上虞之達谿悅餘



姚山水再遷餘姚之新河於是餘姚有呂氏呂與李聲相近也 高皇帝新立用法嚴當貴義公世籍戶口書誤易呂以李及覺而籍已土欲請更不敢貴義用是缺然以終其身及簣呼其子德玉訣曰吾死其令呂氏子孫世世著妙生則從李而已沒仍呂自鍊至德玉世修德聞於姚自德玉幾傳而有今師相公名本以對策中 上旨甲第歷翰林自國子師拜相佐 世皇帝致太平十有四年辛酉夏以太夫人憂歸服既闋舉廢追遠漈沒一新顧謂冢子禮部君元

日姚自始圖遷以來積德幾二百年而始集於我幸  
不墜其可以怠厥事女其更營之禮部君亟共命趨  
而拓舍旁地以祠四公自錄至德王治主以升又置  
田若干畝以給其屋儀物數登降之節悉如我明  
集禮始某年某月日師相公樂觀其成扁其門曰呂  
氏遷姚始祖祠使來命其以詞曰予將剏諸牲石某  
再拜皇汗謹按呂世侯伯自夏封太岳周太公望封  
齊入漢以高后戚封侯者亦多至二十餘人而霸晚  
最顯其後子孫在魏有虔在唐有延之延之子有渭

渭之子有溫有公在石晉有琦在宋有蒙正有端端  
子由誠由誠子億實始新昌凡茲十一公一侯兩相  
上卿者四人侍從出守者視之噫盛矣然始衰於戚  
當二十侯時族矣而霸僅以釋免積千百家而後有  
文穆公蒙正正惠公端及鏐之圖遷也又以戚雖禍  
殊族然播越亦幾衰矣又積二百年而始有公其在  
三代則太岳太公望在宋則文穆正惠也功德在天  
下發祥在祖宗報之以祠孰曰不宜某遂頓首作詩  
曰

周呂纘夏胙土於青祀岳煮海實惟神明迨於中不  
兩以戚故日中而昃亦世之數在漢不戚馴至霸虔  
大起宋唐十有一賢惟賢伊何二相四卿他昔侍從  
代爲明臣自剡之居則爲宋戚再卜而遷乃居姚邑  
始陟於鎌積二百年又大於公師帝格天功德業業  
爲望爲岳其在宋室正惠文穆相公曰噫荷茲景禎  
是不在我福由祖胚作祠於姚實尋故址宏構拓基  
則自公始旣卜四主用牢以升春秋饗祭嗣歲肇興  
室宇物儀遵我王制族宗百口可謂曰知檐角暈飛

江海之湄追遠歸厚式此孝思

石刻孔子像記 亦一證據

何氏餘冬錄載黃伯固曰偶考夫子象無髯惟家廟小影爲真又引孔叢子云先君無髯髯近郎氏七修稿亦云吾夫子七十二表形容盡矣今象夫子者多鬚而彼表獨不稱須可疑也意伯固所顧有據然予讀家語孔子適鄭與弟子輩相失獨立郭東門鄭人謂子貢曰東門有人類似堯項類臯陶肩類子產然腰以下不及禹三寸累累若喪家之狗子貢以告孔

子笑曰形狀未也而曰似喪家之狗然哉噫吾夫子之然殆傷已往往於諸國君而往往不遇終無所投止四顧徘徊如喪其家者然也不遇則何補於東周此春秋所以作也故曰吾志在春秋噫徒志而已矣東門人乃親見夫子孔叢子夫子後而荀子書云東門子姑布子卿則善相人者竝不髯夫子則貌夫子者宜不髯韓昌黎肥而胡韓熙載癯而略鬚兩人皆謚文公姓又同繪事者亦兩相誤乃知人間事誤不少

烈婦姚氏記

代

他人屬事非不切實終如嚮

邇每誦此文真有感歎

隆慶六年七月九日郡城三校諸生上書於浙代巡  
謝公言山陰縣十六都民姚忠女姚氏當嘉靖三十  
六年甫十有六嫁本縣迎恩坊民朱縉縉父故權吏  
死而家益貧縉嗜酒失業閱四年并其妻自鬻於某  
宦家將挈以之京妻覺之恚曰是將及我且吾夫總  
辱吾夫族若吾族儒家也奈何令儒家女蒙嫌至此  
哉欲拒知不可乃夜紉其裙袂以自閉懷石沈河死

實下和豐坊界上去其居不百武其後縉竟以貧死  
無家且無後事遂不章唯明公仗節蒞浙急大體先  
教化所至郡邑錄忠孝貞廉之輩以風曉末俗無間  
幽顯如姚氏者不宜久使沈淪公覽書下其事於縣  
長吏長吏詣姚氏故所居處召三老子弟及故嘗曉  
此者問所以咸如諸生言謂宜表姚氏宅而縉先以  
無家死表無所歸始議碑於其故沈所以覆公報曰  
可且曰碑以表姓氏久卽湮耳其記之以備作志者  
之采令君謹承公命來徵記其旣記其事如右因感



之而嘆口。余老矣。垂八十矣。涉事頗不淺。至每見旌  
婦人問之。非某貴人之妻。則曰某貴人母也。雖未必  
盡然。要之槩如是耳。於是受旌者方矜之。以爲甚難。  
而評乎旌者。且眇之。以爲甚易。夫旌之者。風之也。苟  
易矣。曷風哉。至如今姚氏舉。則絕及是。蓋受旌者得  
之爲甚易。而評乎旌者重之爲甚難。難之者。風之也。  
噫。惜哉。不意余老垂八十。而復一見院臺邑長之善  
於風民若此也。故於記事之餘。并及之以告。

鎮海樓記

代

雋偉閎暢足稱大篇

鎮海樓相傳爲吳越王錢氏所建用以朝望汴京表  
臣服之意其基址樓臺門戶欄楯極高廣壯麗具載  
別志中樓在錢氏時名朝天門元至正中更名拱北  
樓 皇明洪武八年更名來遠時有術者病其名之  
書畫不祥後果驗乃更今名火於成化十年再建嘉  
靖三十五年九月又火予奉 命總督直浙閩軍務  
開府於杭而方移師治寇駐嘉興比歸始與某官某  
等謀復之人有以不急病者予曰鎮海樓建當府城  
之中跨通衢截吳山麓其四面有名山大海江湖潮

汝之勝一望蒼茫可數百里民廬舍百萬戶其間村市官私之景不可億計而可以指顧得者惟此樓爲傑特之觀至於島嶼浩眇亦宛在吾掌股間高翥長騫有俯壓百蠻氣而東夷之以貢獻過此者亦往往瞻拜低回而始去故四方來者無不趨仰以爲觀遊的如此者累數百年而一旦廢之使民悵然若失所歸非所以昭太平悅遠邇非特如此已也其所貯鍾鼓刻漏之具四時氣候之榜令民知昏曉時作息寒暑啓閉桑麻種植漁佃諸如此類是居者之指南也

而一旦廢之使民憤然迷所往非所以示節序全利用且人傳錢氏以臣服宋而建此事昭著已久至方國珍時求緩死於我高皇猶知借鏐事以請誠使今海上羣醜而亦得知錢氏事其所款如珍之初詞則有補於臣道不細顧可使其跡湮沒而不章耶予職清海徼視今日務莫有急於此者公等第營之母浚徵於民而務先以已於是予與其官某某等捐於公者計銀凡若干募於民者若干遂集工材始事於某年月日計所構甃石爲門上架樓樓基疊石高若

千丈尺東西若干步南北半之左右級曲而達於樓  
樓之高又若干丈凡七楹礎百巨鐘一鼓大小九時  
序榜各有差貯其中悉如成化時制蓋歷幾年月而  
成始樓未成時劇寇滿海上予移師往討日不暇至  
於今五年寇劇者禽來者遁居者懾不敢來海始晏  
然而樓適成故從其舊名曰鎮海

酬字堂記

黃花瘦石不妨幽致

鎮海樓成少保公進渭曰是當記子爲我草草成以  
進公賞之曰聞子久僑矣趣召掌計廩銀之兩百有

二十爲秀才廬。渭謝侈不敢。公曰：我愧晉公子，於是文乃遂能愧。湜儻用福先寺事數字，以責我。酬我其薄矣。何侈爲？渭感公語，乃拜賜，持歸盡橐中賣文物。如公數買城南東地十畝，有屋二十有二間，小池二。以魚以荷，木之類果花材三種，凡數十株。長籬亘畝，護以枸杞，外有竹數十箇。笋迸雲客至，網魚燒笋佐以落果，醉而詠歌。始屋陳而無次，稍序新之，遂額其堂曰酬字。

徐文長文集卷之二十四

終